

## «Oäk, oäk»

### Rauna invasiva terrorisescha la Val dal Rain d

■ **(sda/anr) Ses quachegiar fa ina tala canera ch'i siglienta la notg la gliued ord la sien. La rauna verda gronda conquista adina pli gronds territoris en la Val dal Rain ed ella stgatscha ils amfibis indigens.**

En ils onns settanta sto esser capità insatge a Sargans che ha chaschunà la derasaziun da la rauna verda gronda (tudestg: Seefrosch). Tge ch'è capità na sa nagin propi. Fatg è che la rauna – ella deriva dal sidost da l'Europa – ha cumenzà ses marsch gist en questa vischnanca da Son Gagl. Probabel èn mitschads intgins animals ch'ins aveva importà sco chommas rauna vivas. U ch'ins ha laschè liber ellas. Las dominantas raunas èn sa derasadas l'emprim vers nord.

#### Quachegim l'entira notg

«Entiras notgs quachegian ellas», di *Christian Öhri*, chanzlist da Ruggell. La vischnanca en il Principadi Liechtenstein aveva stgaffì il 2013 ina oasa natirala en il vitg. La rauna verda è immediat sasen-

tida da chasa en il lai. Ils vaschins n'han prest betg pli pudì clauder egl la notg.

«Oäk, oäk», cloma il mastgel per margar ses revier. Sch'el carmala per famella tuni «rec-heck». La ruaida cuntanscha fin 90 decibel. Cuzunt sch'ìls mastgels chantan en chor tuni pli fitg ch'ina maschina da manizzar asphalt. La ruaida è daventada uschè mulestusa che la vischnanca ha pupè emplenì il pitschen lai. Ma las raunas èn restadas. Ellas èn simplamain sa chasadas en in dutg, nua ch'ellas pon probabel almain betg sa multipligar.

#### La rauna è prest a Cuira

Betg sulet vers il Principadi, mabain era da l'autra vart dal Rain procura la rauna per malavita. En il fratemp sa mova l'animal vers il sid. Fin avant trais onns n'ha ja il chantun gì naginas raunas verdas, di *Hans Schmocker* da l'associazion grischuna per la protecziun da reptils ed amfibis. Lura è ella cumparida er en il Grischun, l'emprim han ins dudì ses quachegiar a

Zebras, lura a Trimmis, ad Untervaz e Fläsch.

Tenor Schmocker n'è fin uss betg la canera il problem, fin uss na saja nagin sa lamentà. L'immigrant saja plitost malvesì perquai ch'el chatschia a chantun ils amfibis indigens. «Nus fissan cuntent sche las raunas quachegiassan dapli. Nus chattassan lura ellas e las pudessan pigliar».

#### Sco da purtar aua en il Rain

Uchè lunsch sco pussaivel vegnan las raunas magliadrunas pigliadas da gliued dal fatg e sturnidas. Ma igl è sco da purtar aua en il Rain. La rauna che cupanescha magari era raunas indigenas sa lascha strusch tegnair si. In studi da l'università da Basilea ha examinà sia derasaziun en il chantun Argovia. Ils auturs dal studi dian che las duas raunas indigenas fissan tschintgiadas pli derasadas senza la smanatscha entras la rauna verda gronda. Il studi tira la bilantscha ch'igl ha strusch la valita da cumbatter quest amfibi.